

## Vijećnička pitanja

**Dževdet Huskić:** je postavio dva vijećnička pitanja. Prvo pitanje je koliko novca je iz Općine Kakanj usmjereno na konkretne projekte za rekonstrukciju, poboljšanje i proširenje mreže daljinskog grijanja u preduzeću „Energokom“ (ex JP „Grijanje“) u periodu od 2015-2025. godina? Naveo je da, prema javno dostupnim podacima iz EP BiH, u posljednjih 11 godina je u Budžet Općine Kakanj iz tog JP uplaćeno po osnovu pet vrsta naknada, ukupno 70.119.827,00 KM, te je s toga pitao koliko novca je, od uplaćenih 70 miliona KM, usmjereno na konkretne projekte na rekonstrukciju, poboljšanje i proširenje mreže daljinskog grijanja u periodu 2015-2025. godina i koji su to projekti? Drugo pitanje je uputio „Energokom“ d.o.o. Kakanj i pitao koliko su imali telefonskih pritužbi na uslugu isporuke toplotne energije od strane korisnika u toku dosadašnjeg dijela sezone grijanja? Naime, u odgovoru na Zaključak Kolegija od 27.02.2026. godine, je navedeno da je bilo samo 5 pisanih zahtjeva za utvrđivanje kvalitete grijanja, pa ga zanima koliko telefonskih pritužbi je bilo, ako se zna da građani kad imaju problem obično zovu telefonom ili izražavaju nezadovoljstvo na društvenim mrežama.

**Adnan Demir:** je postavio vijećničko pitanje da li je razmatrana inicijativa upućena od više mjesnih zajednica, a koja se odnosi na izmjenu Prostornog plana Općine Kakanj s ciljem zaštite prirodnog područja u neposrednoj blizini naselja Mioči, te koji su zaključci doneseni s tim u vezi? Podsjetio je da je Općinskom vijeću je upućena inicijativa od strane mjesnih zajednica kojom se traži izmjena Prostornog plana Općine Kakanj s ciljem zaštite prirodnog područja u neposrednoj blizini naselja Mioči. Traži da mu se odgovori koje su konkretne pravne aktivnosti poduzete od strane nadležnih općinskih organa do sada u vezi sa pokušajem obnove okolinske dozvole od strane „Bioorganika“ d.o.o. Kakanj, te da li nadležni općinski organi razmatraju izmjenu Prostornog plana Općine Kakanj kao pravno održiv i preventivan mehanizam za onemogućavanje izgradnje spomenute spalionice animalnog otpada?

## Vijećničke inicijative

**Hamza Vahid El-Din:** je pokrenuo dvije vijećničke inicijative. Prva inicijativa za izgradnju kanalizacione mreže u naselju Rošćevina. Naveo je da je informisan od mještana naselja Rošćevina da to naselje nema izgrađen sistem kanalizacione mreže, odnosno da je odvodnja otpadnih voda organizovana na individualnom nivou, tj. na nivou domaćinstva. U ime mještana naselja Rošćevina apelovao je da Zavod u skladu sa svojim mogućnostima i operativnim planovima, u budućnosti planira izgradnju kanalizacione mreže, kako bi se na organizovan način riješio problem odvodnje otpadnih voda, što bi bilo od izuzetnog značaja za mještane Rošćevine. Druga inicijativa je za zaštitu prirodnog, kulturnog i historijskog područja kod naselja Mioči. Naveo je da od skretanja sa regionalne ceste prema naselju Mioči protiče manja rijeka, čiji tok, biološka raznolikost i čistoća predstavljaju važan resurs, koji zaslužuje institucionalnu zaštitu. Dodatno, prema navodima lokalnog stanovništva, na ovom području se nalaze izvori tople vode, kao i ostaci starih groblja nepoznatog perioda nastanka. S toga smatra da je kroz pokretanje procesa izmjene Prostornog plana Općine Kakanj potrebno zaštititi ovo područje.

**Ilda Arnautović:** je pokrenula vijećničku inicijativu za uređenje pješačke staze iznad zgrada M1 i M2 koja vodi prema gradskoj pijaci i tržnom centru „Best“. Na pomenutom lokalitetu se nalazi neuređena pješačka staza koju svakodnevno koristi veliki broj građana, posebno tokom pijačnog dana. Staza je od posebnog značaja za starije osobe jer predstavlja najkraći i najpristupačniji put do pijace i okolnih sadržaja. Ista je trenutno neuređena, bez rasvjete i osnovne komunalne infrastrukture, što otežava kretanje i smanjuje sigurnost naročito u večernjim satima i tokom loših vremenskih uslova. Otvaranjem tržnog centra „Lidl“ očekuje se dodatno povećanje frekvencije pješaka. Iz tog razloga je predložila da se: izvrši uviđaj stanja na terenu; - očisti i uredi staza; - izvrši nasipanje ili trajno uređenje (popločavanje gdje je moguće); - postavi javna rasvjeta; - postave klupe i kante za otpad; - razmotri trajno uređenje staze kao zvanične pješačke komunikacije.

**Dževdet Huskić:** je pokrenuo dvije vijećničke inicijative. Prva inicijativa da se Općina Kakanj više fokusira na dobrobit i uspjehe domaćih kompanija i lokalnih privrednika nego na promociju stranih brendova i kompanija koje dolaze van granica naše općine. Osvrnuo se na posljednju u nizu objava na FB stranici „Općina Kakanj – načelnik“ o mogućem preuzimanju lokalne benzinske pumpe od strane „Bingo Petrol“. Smatra da Općina treba više djelovati na promociji, zaštiti i subvencijama lokalnih privrednika, da kroz konkretne i kvalitetne programe stimuliše širenje lokalnih firmi u druge općine, a ne slaviti dolazak stranih firmi i brendova koji u Kakanj dolaze isključivo da poberu novac uz minimalna ulaganja. Druga inicijativa je upućena JP „Enegokom“ kojom traži da mu se dostave kopije zahtjeva i naloga na osnovu kojeg je vršeno utvrđivanje kvalitete grijanja u stanu porodice Huskić dana 22.01.2026. godine, kao i Izvještaja koji je sačinjen nakon navedenog mjerenja. Razloga za inicijativu je što postoji sumnja u zloupotreba resursa u javnom preduzeću, jer je kontrola uslijedila nakon što je na Kolegiju OV predložio da se u dnevni red sjednice Vijeća uvrsti Informacija o stanju sistema grijanja i toku tekuće grejne sezone, a sve imajući u vidu česte pritužbe građana na loš kvalitet grijanja. Napomenuo je da nikakav zahtjev od strane porodice Huskić nije upućen JP „Enegokom“ u kojem se traži navedena usluga/mjera.

Predsjedavajući je konstatovao da su vijećnici: Armin Bašić, Sanel Šabanović i Edin Šljivo podnijeli vijećničke inicijative bez korištenja govornice.

**Armin Bašić:** je pokrenuo vijećničku inicijativu za hitnu organizacionu izmjenu i dopunu saobraćajnog projekta gradskih saobraćajnica sa nužnim proširenjem obuhvata na periferne dijelove i prigradska naselja. Razlog za inicijativu su svakodnevni zastoji u saobraćaju, te narušena bezbjednost pješaka i drugih učesnika u saobraćaju.

**Sanel Šabanović:** je pokrenuo dvije vijećničke inicijative. Prva inicijativa za postavljanje kamera videonadzora na lokaciji Park prijateljstva u Kaknju. Inicijativu je podnio u cilju unapređenja sigurnosne situacije na području općine Kakanj imajući, a imajući u vidu da Park prijateljstva predstavlja jednu od najposjećenijih javnih površina u Kaknju, koju koriste djeca, mladi, porodice i starije osobe. Predlaže da se postave kamere videonadzora na ključnim tačkama parka, uključujući centralnu zonu, prilazne staze, dječije igralište i dijelove s većom frekvencijom građana u večernjim

satima. Videonadzor bi trebao biti integrisan u sistem MUP-a ZDK kako bi se omogućilo kontinuirano praćenje i pravovremeno reagovanje.

Druga inicijativa se odnosi na dodjelu i označavanje parking mjesta Udruženju roditelja djece sa poteškoćama u razvoju „Djeca sa izazovom“ Kakanj. Predlaže da se ovom Udruženju dodijeli jedno parking mjesto na korištenje, da se isto označi prigodnom vertikalnom i horizontalnom signalizacijom, a sve kako bi se olakšao pristup prostoru u kojem djeca borave, kako djeci tako i njihovim roditeljima.

**Edin Šljivo:** je pokrenuo dvije vijećničke inicijative. Prva inicijativa za izgradnju širokog usporivača brzine na regionalnom putu R-466 u naselju Podbjelavići. Naime, na navedenoj cesti u blizini benzinske pumpe „Best“ potrebno je izgraditi usporivač brzina i pješački prelaz sa signalizacijom, obzirom da je put frekventan sa ograničenjem brzine od 50 km/h, a na tom mjestu prelaze građani do ambulante koja se nalazi u zgradi benzinske pumpe, te djeca iz gornjeg dijela naselja prelaze put do trotoara koji vodi do OŠ „Omer Mušić“, odnosno sa autobusnog stajališta prelaze na trotoar i obratno.

Izgradnjom usporivača bi se značajno povećala sigurnost pješaka i ostalih učesnika u saobraćaju. Druga inicijativa se odnosi na uređenje javnih površina i infrastrukture u Ulici bratstva i jedinstva u MZ Povezica (od mosta Zlatinih ljiljana do Cementarskog mosta). Inicijativa obuhvata radove sanacije i farbanja zaštitne ograde na šetnici pored rijeke Bosne, sanaciju i zamjenu oštećenih drvenih klupa na šetalištu, sanaciju udarnih rupa na saobraćajnici u navedenoj ulici, orezivanje drveća i šiblja koje zauzima dio puta i samim tim smanjuje preglednost puta vozačima.